

四庫全書

子部

欽定四庫全書

子部

冊府元龜卷一百七
十至

詳校官中書臣瞿 照

員外郎臣牛稔文覆勘

總校官庶吉士臣何思鈞

校對官中書臣王 瓚

謄錄貢生臣湯安泰

欽定四庫全書

冊府元龜卷一百七

宋

王欽若等撰

帝王部

朝會第一

夫春朝夏宗秋覲冬遇天子端委而嚮明諸侯輯瑞而畢會九賓在位三揖成禮號令憲章於是乎出聲名文物罔有不備寅恭者加禮怠惰者貶爵所以訓上下之則正君臣之序教庶民以事上示率土以大同也夏禹

之塗山刑辟以討後至康王之艷宮慈惠以接來庭三代之制於斯為盛厥後質文雖異因革同歸罔不修其班制差其功位既以述職亦用講禮蓋昧爽而聽政人君之盛儀假寐而待旦人臣之忠節臨三軍者以之生懼有家邦者其可忽此至若甘泉受計露門頒令小正以和見仲夏以咸覲奉乎皮幣錫以車馬發樽以求諫交戟以宣威此歷代之遺美前王之令範書之方冊可為彛訓隋氏而上火多闕文唐室而下所記詳悉並詮

次其事列之於篇其有長樂之尊承華之貴三元慶賀
率為典故以至國家多事因而廢朝咸附之言爾

虞舜正月上日受終於文祖

上日朔日也終謂堯終帝位之事文祖者堯始祖之

廟

輯五瑞既月乃日覲四岳羣牧班瑞於羣后

輯斂既

班還后君也舜斂公侯伯子男之瑞圭璧盡以正月中心乃日見四岳及九州牧監還五瑞於諸侯與之正始也

夏禹合諸侯於塗山執玉帛者萬國

諸侯執玉帛塗山在壽春東

北

周成王即位少周公攝政朝諸侯於明堂之位

周公攝王位以

明堂之禮儀朝諸侯不於宗廟避王也

天子負斧扆南向而立

天子周公也負之言

背也斧扆為斧文屏風於戶牖之間周公於前立焉

三公中階之前北面東上諸

侯之位阼階之東西面北上諸伯之國西階之西東面

北上諸子之國門東北面東上諸男之國門西北面東

上九夷之國東門之外西面北上八蠻之國南門之外

北面東上六戎之國西門之外東面南上五狄之國北

門之外南面東上九采之國應門之外北面東上四塞

世告至此周公明堂之位也

朝之禮不於此周公權用之也朝位之上近主位尊

也九采九州之牧典貢職者也正門謂之應門二伯帥諸侯而入牧居外而糾察之也四塞謂夷服鎮服在四方為蔽塞者新君即位則來朝周禮侯服歲一見甸服二歲一見男服三歲一見采服四歲一見衛服五歲一見要服六歲一見九州之外謂之蕃國世一見

康王既尸天子

尸主也主天子之位號

出在應門之內

出臯門立應門內之

中處南面太保帥西方諸侯入應門左畢公率東方諸侯入

應門右

二公為二伯各率其所掌諸侯隨其方為位皆北面

皆布乘黃朱

諸侯皆陳四黃

馬朱鬣以為庭實

賓稱奉圭兼幣曰一二臣衛敢執壤奠

賓諸侯也

敢執壤地所出而奠誓也

皆再拜稽首王義嗣德答拜

康王以義繼先人明德答

其拜受其幣

太保暨芮伯咸進相揖皆再拜稽首

家宰與司徒皆共羣

臣諸侯並進陳戒不言諸侯以內見外

其後康王又有酆宮之朝

酆在始平酆縣

東有靈臺康王於是朝諸侯

穆王有塗山之會

漢高帝七年長樂宮成諸侯羣臣朝十月

高帝因秦制以十月為歲

首用叔孫通新儀先平明謁者治禮引以次入殿門庭

中陳車騎步卒衛官設兵張旗志

志與幟同音式餌切

傳言趨

傳聲

教人者皆令趨謂疾行為敬也

殿下郎中俠陛數百人

俠與夾同俠其兩傍每陛

皆數百人

功臣列侯諸將軍軍吏以次陳西方東鄉文官

丞相以下陳東方西鄉大行設九賓臚句傳

上傳語告下為臚下

告上為句也大行掌賓客之禮今之鴻臚也九賓則周禮九儀也公侯伯子男孤卿大夫士也臚音盧於

是皇帝輦出房百官執戟傳警

傳聲而唱警

引諸侯王以下

至吏六百石以次奉賀自諸侯王以下莫不震恐肅敬

至禮畢盡復置法酒

法酒者猶言禮酌謂不飲之至醉

諸侍坐殿下皆

伏抑首

抑屈也謂禮法不敢平坐而視

以尊卑次起上壽觴九行謁者

罷酒御史執法舉不如儀者輒引去竟朝置酒無敢讙

譁失禮者於是高帝曰吾乃今日知為皇帝之貴也

武帝元封五年春南巡狩還增封泰山因朝諸侯王列

侯受郡國計

計若今諸州計帳也

太初元年春受計於甘泉

天漢四年正月朝諸侯王於甘泉宮

後元二年正月朝諸侯王於甘泉宮

宣帝神爵元年六月詔曰軍旅暴露轉輸煩勞其令諸

侯王列侯蠻夷王侯君長當朝二年者皆毋朝

後漢安帝永初四年正月元日會徹樂不陳充庭車

每大

朝會必陳法物車輦於庭故曰充庭車以年饑故不陳

魏齊王景初元年正月即位七月始親臨朝聽公卿奏事

晉武帝泰始六年正月丁亥朔帝臨軒不設樂

史不載其所以

不設樂之故

元帝大興元年正月戊申朔臨朝懸而不樂

時懸帝蒙塵

明帝太寧元年三月戊寅朔改元臨軒

二年正月丁丑帝臨朝停饗宴之禮

穆帝永和六年帝臨朝以褚裒喪故懸而不樂

褚裒康獻皇后

之
父

七年正月丁酉朔日有食之先是廷尉王彪文與揚州刺史殷浩書曰太史上元日合朔談者或有疑應却會與不昔建元元年亦元日合朔唐車騎寫劉孔才所論以示八座于時朝議有謂孔才所論為不得禮儀苟令從之是聖人之一失也何者禮云諸侯旅見天子入門

不得終禮而廢者四太廟火日蝕后之喪雨雪服失容
尋此四事之指自謂諸侯雖已入門而卒暴有之則不
得終禮非謂先存其事而徼倖史官推術錯謬故不預
廢朝禮也夫三辰有災莫大日蝕史官譴而無懼容不
修預防之禮而廢消救之術方大饗華夷君臣相慶豈
是將虔天災罪已之謂且檢之事實合朔之儀至尊靜
躬殿堂不聽政事冕服御坐門闥之制與元會禮畢自
不得兼行則當權其事宜合朔之禮不輕於元會元會

有可却之準合朔無可廢之儀謂應依建元故事却元會浩從之竟却會

十年正月己酉朔帝臨朝以五陵未復懸而不樂

十二年正月丁卯帝臨朝以皇太后母喪懸而不樂

恭帝元熙元年正月壬辰朔改元以山陵未厝不朝會後魏大武正平元年正月丙戌朔帝南伐臨江大會羣

臣於江上

孝文太和十年正月癸亥朔帝始服袞冕朝饗萬國

十五年十一月丙戌初罷小歲賀

小歲謂冬至

十八年春正月丁未朔朝羣臣於鄴宮澄鑾殿

十九年十二月乙未朔引見羣臣於光極堂甲子又引見羣臣於光極堂班賜冠服

出帝太昌元年十二月戊戌朝會百官於太極前殿

後周武帝保定五年春正月甲申朔廢朝以康國公王雄死王事故也

天和六年春正月己酉朔廢朝以路門未成故也

建德三年正月壬戌朝羣臣於路門

宣帝大象元年正月己丑受朝於路門帝服通天冠絳紗袍羣臣皆服漢魏衣冠大赦改元

二年正月丁亥帝受朝於道會苑

唐高祖武德九年正月庚寅朔廢朝雨也

太宗貞觀十一年正月朔帝臨軒懸而不樂禮也

為高祖憂

故

十三年正月僕射房玄齡奏天下太平萬機事簡請三

日一臨朝詔許之

十五年正月庚午朔帝常服不臨軒行幸維陽宮衣冠
禮樂闕設也

二十年正月甲子朔太宗常服不臨軒行在故也

是年征遼

回

高宗貞觀二十三年即位九月十一日太尉無忌等奏
請視朝坐日帝報曰朕登大位日夕孜孜猶恐壅滯衆
務自今已後每日常坐

永徽二年八月二十九日下詔來月一日太極殿受朝
此後每五日一度太極殿視事朔望即為常式

四年正月癸丑朔帝臨軒懸而不樂以濮王泰在殯故
也

六年正月壬申親謁昭陵甲戌至自昭陵庚子受朝賀
於太極殿

顯慶二年二月太尉長孫無忌等奏以天下無虞請隔
日視事許之

中宗神龍元年四月癸亥初令文武官四品已上每朔望叅日升殿食丙子以時屬炎暑制令每隔日方坐左拾遺靳常上疏諫不納

事具諫諍直諫門

二年正月庚子朔以則天皇后梓宮在殯不朝會

睿宗太極元年正月癸丑釋慄服御正殿奏廣樂於庭受皇太子及百官朝賀

玄宗先天二年正月太上皇詔正月十五日朝改取十一日每年皆然又非朔望日而同朔望受朝者前後有

誥非一

開元四年正月戊寅朔帝御正殿受朝賀禮畢親朝太
上皇于西宮

五年正月壬寅朔帝不受朝太上皇喪制故也

七年正月辛卯朔御含元殿受朝仗衛如常儀

八年十一月中書門下奏曰伏以冬至一陽初生萬物
潛動所以自古聖帝明王皆於此日朝萬國視雲物禮
之大者莫逾是時其日亦祀圜丘皆令攝官行事質明

既畢日出視朝國家已來更無改易緣新格將其日記園丘遂改用小冬至日受朝若親拜南郊受朝須改既令攝祭禮不可移伏請改正從之因勅自今冬至日受朝永為常式

十年正月癸卯朔御含元殿受朝賀

十一年十二月二十四日勅萬春公主薨廢元日朝賀

十六年正月戊戌朔始聽政於興慶宮朝賀如常儀

臣欽

若等曰興慶宮聽政自此始

十一月乙巳日南至御含元殿受朝賀

如常儀

十八年正月癸酉御含元殿受百寮朝賀如常儀

二十一年正月庚子朔御含元殿受朝賀如常儀

二十二年閏十一月壬午朔日有食之是日長至停朝

癸未御應天樓受朝賀是日詔諸州考使六品以下朔

望日朝宜准例賜食

二十三年正月戊申朔御含元殿朝賀如常儀

二十六年正月庚午朔御含元殿朝賀如常儀

二十八年正月戊子朔御含元殿朝賀如常儀

二十九年正月癸未朔御含元殿朝賀

天寶元年正月丁未朔御勤政樓受朝賀大赦天下改
開元三十年為天寶元年

二年正月辛丑朔御含元殿受朝賀

三載正月丙辰朔御含元殿受朝賀

四載正月己未朔御含元殿受朝賀

五載正月癸丑朔御含元殿受朝賀

六載正月辛巳朔御含元殿受朝賀是月詔曰今勝殘
在運無事為心願此朝儀當符至理既時非盱食將致
昇平而建設殺刑何成在宥其每日立仗食及杖鋌等
並宜停廢十一月辛卯朔引朝集使及貢舉人見十二
月丙寅仗下後百官於尚書省閱貢物

七載正月壬申朔御含元殿受朝賀

八載正月丙寅朔御含元殿受朝賀

九載正月庚寅朔帝御華清宮受朝賀

十載正月乙酉朔御含元殿受朝賀十一月丙午冬至
御觀風樓受朝賀

十一載正月己卯朔帝御華清宮受朝賀

十二載正月癸卯朔帝御含元殿受朝賀

十三載正月丁酉朔幸華清宮御觀風樓受朝賀

十四載正月庚申朔御含元殿受朝賀

十五載正月乙卯朔御宣政殿受朝賀

肅宗至德三載正月甲戌朔御含元殿受朝百官上壽

稱賀

乾元二年十一月丁亥冬至帝朝聖皇於興慶宮翌日受朝於含元殿

三年正月癸亥朔帝御含元殿受朝中書令代國公李儀攝太尉上壽稱賀朝退百僚於宣政殿起居聖皇乙丑常服於崇明門通賀皇太子丙寅外命婦朝皇后於光順門內殿

上元二年正月丁亥朔御含元殿受朝賀禮畢百官起

居聖皇己丑外命婦朝皇后百官賀皇太子

元年建子月壬午朔帝御含元殿受朝賀畢羣臣起居
聖皇癸未內外命婦朝皇后百官起居皇太子戊戌冬
至受朝賀禮畢朝聖皇於西宮百官進名起居

代宗廣德二年正月己亥朔御含元殿受朝賀如常儀
六月丁卯朔始御宣政殿受朝以國哀終制故也凡朔
望朝於殿前舊章也九月乙未朔自八月連雨至是日
不止宰臣元載等奏曰准儀制令泥雨合停朝叅今緣

軍國事繁准式停朝恐有廢闕望延三刻傳點從之十一月甲寅是日長至御含元殿受朝賀仗衛如常儀禮畢百官詣崇明門進名謁皇太子

永泰元年正月癸巳朔御含元殿下制大赦天下宣制畢乃受朝賀禮畢百官詣崇明門進名謁皇太子十一月己未是日長至御含元殿受朝賀仗衛如常儀禮畢百官詣崇明門進名謁皇太子

二年正月丁巳朔御含元殿受朝賀仗衛如常儀禮畢

百寮詣崇明門進名謁皇太子十一月甲子長至含元
殿下制大赦改元大歷宣制畢乃受朝賀禮畢百寮詣
崇明門進名謁皇太子

大歷二年正月壬子朔御含元殿受朝賀仗衛如常儀
禮畢百寮詣崇明門進名謁皇太子十一月己巳長至
御含元殿受朝賀仗衛如常儀禮畢百寮詣崇明門進
名謁皇太子

三年正月丙午朔御含元殿受朝賀仗衛如常儀禮畢

百寮詣崇明門進名謁皇太子十一月甲戌長至御舍
元殿受朝賀仗衛如常儀禮畢百寮詣崇明門進名謁
皇太子

八年正月丁丑朔御舍元殿受朝賀仗衛如常儀禮畢
百寮詣崇明門進名謁皇太子閏十一月壬寅朔冬至
御舍元殿受朝賀仗衛如常儀禮畢百寮詣崇明門進
名謁皇太子

九年正月庚子朔御舍元殿受朝賀仗衛如常儀禮畢

百寮詣崇明門進名謁皇太子十一月甲戌長至御含
元殿受朝賀仗衛如常儀禮畢百寮詣崇明門進名謁
皇太子是時四方無事間日坐朝雙日不復入閣

十年正月乙未朔御含元殿受朝賀仗衛如常儀禮畢
百寮詣崇明門進名謁皇太子十一月丙午長至詔停
賀邇梁王葬期也

十一年正月庚寅朔御含元殿受朝賀仗衛如常儀禮
畢百寮詣崇明門進名謁皇太子十一月丁巳冬至御

含元殿受朝賀仗衛如常儀禮畢百寮詣崇明門進名謁皇太子

十二年八月以久雨省常叅百寮不許御史點班

十三年正月戊申朔御含元殿受朝賀仗衛如常儀仗以後百寮詣崇明門進名謁皇太子十一月丁卯長至命有司祀昊天上帝于南郊不視朝戊辰上御含元殿朝賀仗衛如常儀禮畢百寮詣崇明門進名謁皇太子十四年正月壬寅朔御含元殿受朝賀仗衛如常儀禮

畢百寮詣崇明門進名謁皇太子

德宗建中元年十一月辛酉朔朝集使及貢使見於宣政殿兵興以來四方州府不上計內外不會同者二十有五年至此始復舊典凡州府計吏至者一百七十有三又命朝集使二人每日待制丁丑日南至戊寅御含元殿受朝賀初令親王出閣就班

二年正月庚申朔御含元殿受朝賀四方貢賦珍寶列為庭實復舊制也

三年正月乙卯朔御含元殿受朝賀

四年正月戊寅朔御含元殿受朝賀禮畢以建中元歷二十八卷示百寮初司天少監徐承嗣奏來年歲次甲子應上元首請修新歷至是成羣臣稱賀

貞元元年七月關中蝗食禾稼無子遺穀大貴八月甲子詔不御正殿奏事悉於延英庚寅視朝於延英殿羣臣列位於延英門外申甲子之詔也丁丑雨戊寅中書門下上言陛下前以愆陽經時避居正殿凡在臣庶無

任兢惶今至誠感通嘉雨露洽兕渠授首同類格心臣
等敢昧死請自今以後依常儀御正殿詔曰可十二月
丁亥詔曰朕以眇身仰承列聖不能纂修先志以洽昇
平馴致寇戎屢興兵革上玄降警蝗旱為災年不順成
人方歉食言念於此實用傷懷是以齋心別宮與人祈
穀雖陽和在候而黔首無聊稱慶於予竊所不敢其來
年正月一日朝賀宜罷

三年正月丙戌朔停朝賀以大行皇后在殯故也庚寅

百寮以停朝賀及是歲假滿於崇明門奉慰皇太子

四年五月庚戌朔御含元殿受朝賀畢御丹鳳門樓大赦天下

五年正月壬辰朔御含元殿受賀

六年正月癸卯朔不視朝先是有司奏元日日有食之遂停朝會及時不食百寮皆賀五月丙寅朔上御紫宸殿受朝先是上以五月一陰生臣子道長君父道衰非善月也父子必以是朔面焉臣子一例因令是月朝見

初將冕服御宣政殿塗潦乃以常服御紫宸殿

七年正月壬戌朔帝不視朝以去年冬親郊故也四月
詔曰仲夏之時陽德方盛陰事始承聖賢因天地交會
之時為父子咸覲之禮既行親戚豈隔君臣自我為初
申恩卿士起今年五月朔御宣政殿召見文武百官九
品以上外官因朝奏咸聽就列仍編入式以為常典五
月庚申朔御宣政殿朝見百官書新禮也十一月丁亥
日南至不視朝

八年正月丙辰朔御含元殿受朝賀五月乙卯朔御宣政殿受朝賀

九年正月庚辰朔御含元殿受朝賀禮畢上賦退朝觀軍仗歸營詩以示宰臣等

十年正月乙亥朔罷朝賀之禮以九年冬郊祀故也

十一年正月庚午朔御含元殿受朝賀五月朔帝御宣政殿受朝八月辛卯廢朝以故端王太妃薨故也十一月丙辰日南至不受朝賀

十二年正月甲午朔御含元殿受朝賀

十三年正月朔御含元殿受朝賀是月御史臺奏諸司

常叅文官隔假三月已上並橫行叅假其武班每月先

配九叅六叅

九叅謂每月九次朝叅
六叅謂每月六次朝叅

比來或經冬至及

歲首寒食等三節假滿不是本配入日並不橫行事實

乖闕請從今已後每經三節假滿縱不是本配入日其

前件官請依文官例橫行叅假底幾周行式序可之五

月丙戌朔以雨罷御宣政殿是月帝以累月天陰街鼓

聲暗百官入朝多走馬奔馳是日令宣示宰臣及百官
曰卿等朝謁是常或陰雨不聞鼓聲則不免奔波走馬
忽有墜損深軫朕懷自今已後縱鼓聲差池亦不得走
馬并時暑稍甚及雨雪泥潦亦量放朝叅宰臣等上表
陳謝

十四年正月朔御含元殿受朝賀五月朔御宣政殿受
朝

十五年正月朔御含元殿朝賀五月朔以雨罷御宣政

殿十一月罷冬至朝賀以興兵討蔡州吳少誠也

十六年正月御含元殿受朝賀五月朔以雨罷御宣政殿是月壬戌以徐州節度張建封卒廢朝近例節度使帶僕射已上者卒廢朝三日尚書已下一日都團練觀察使則否洎貞元八年嗣曹王臯李自良皆知節度帶尚書卒各輟朝三日至十四年樊澤以僕射卒廢朝一日十五年黔中觀察使王礎卒特為廢朝以例不定故書之十一月戊戌以齊國大長公主薨廢朝三日己亥

以義陽公主薨起今七日廢朝三日是月罷冬至朝賀
以襄王第五男薨廢朝

十七年正月朔御含元殿受朝賀

十八年正月戊午朔大雨雪罷朝賀

十九年正月朔御含元殿受朝賀

二十年正月朔御含元殿受朝賀五月朔罷御宣政殿

二十一年正月朔御含元殿受朝賀

憲宗永貞元年十月丙申百寮於興慶宮起居皇太子

十一月己亥日南至百寮詣興慶宮起居皇太子
元和元年正月丙寅帝率百寮於興慶宮奉冊太
上皇尊號丁卯御含元殿受朝賀四月御史中丞
武元衡奏正衙待制官兩員本置前官以備顧問
比來正衙多不奏事又貞元七年更有次對雖議
兩置去歲次對已停則待制唯六品清官恐非盡
善請自今已後尚書省六品已上諸司四品已上
職事官東宮師傅賓詹及王傅等每坐日令兩人

待制退朝詣延英候對從之十二月甲辰日南至權停朝賀羣臣詣興慶宮稱賀皇太后

二年二月己巳宰臣延英罷對起居舍人鄭隨次對詔入面受進止令宣付兩省供奉官自今已後有事即進狀來其次對宜停初貞元七年詔每御延英引見常叅官二人訪以政道謂之次對官所以廣視聽也宰臣奏罷時議非之是年六月丁巳朔百官初入待漏院候禁門啟入朝故事建福望仙等門昏而闔五更而啟與諸

里門同時至德中有吐蕃囚自金吾仗亡命因勅晚開
宰相待漏於太僕寺車坊至是始命有司各據班品置
院於建福門外

三年正月癸未朔以將受尊號元日權停朝賀百官詣
興慶宮進名起居皇太后又赴延英門進名奉賀四月
勅舊制五月一日御宣政殿受朝賀禮宜停初貞元六
年德宗以五月一陰生臣子道長君父道衰非善月也
故人之父子必以是月朔面焉遂為常俗臣子一也因

詔以是日御正殿與羣臣相見其後每歲率多權停帝以數術之說經典不載遂罷之十一月甲申日南至權停朝賀羣臣詣興慶宮奉賀皇太后

四年正月戊寅朔御含元殿受朝賀禮畢百官詣興慶宮賀太后

五年正月壬寅朔御含元殿受朝賀十二月制來年正月一日御含元殿受朝賀令所司准式

六年正月丙寅朔御含元殿受朝賀十一月乙巳勅令

年冬至朝賀宜權停十二月庚午以苦寒放朝五日閏十二月壬子勅來年正月一日御含元殿受朝賀興慶宮叅賀皇太后並宜權停

七年正月辛酉朔帝不受朝賀以皇太子薨廢朝故也四月壬子開延英對宰臣以下是月以惠昭太子葬復多雨至是積旬有六日方坐朝十二月戊戌勅來年正月一日御含元殿宜令所司准式甲寅晦宰臣並宿于中書

八年正月乙卯朔御含元殿受朝賀十月丙辰以大雪放朝三日十一月庚戌朔勅權停冬至朝賀

九年正月己酉朔含元殿受賀百寮退謁皇太子於崇明門乃詣興慶宮候皇太后起居六月癸卯以時暑甚放百官五日叅戊寅以豐州刺史天德軍經畧使周懷義卒廢朝一日經畧使廢朝自懷義始也

十年正月癸酉朔御含元殿受朝賀既退百官赴崇明門通刺謁皇太子又赴興慶宮候皇太后起居三月壬

申朔御延英殿召對宰臣故事朔望日皇帝御宣政殿見羣臣謂之大朝玄宗始以朔望陵寢薦食不聽政其後遂以為常今之見宰臣特以事召也六月勅御史臺自今以後常叅官入朝以見到人名銜進來其朔望及雙日莫進十二月勅淮蔡未賓師人暴露而三朝之會萬國來庭舉樂稱慶有懷愧惕其來年正月朝賀宜權停諸軍優賜並准例處分

十一年正月丁卯朔不受朝賀宰臣率百官泊内外命

婦起居皇太后於興慶宮

十二年正月辛酉朔以淮右宿兵不受朝賀十月乙卯
隋唐節度使李愬帥師入蔡州執賊帥吳元濟以聞淮
西平辛巳御宣政殿受賀九品以上及宗子四夷之使
皆會

十三年正月乙酉朔御含元殿受朝賀畢御丹鳳樓大
赦天下

十四年正月庚辰朔不受朝賀以東討淄青李師道未

班師故也

穆宗以元和十五年即位閏正月丁巳詔以二月五日御丹鳳樓宣令所司准式二月辛巳太常禮院奏准禮及開元乾元上元元和以來元日及冬至日皇帝御含元殿受朝賀禮畢百寮赴皇太后所居殿門外進名候起居諸親及內外命婦並有朝會叅賀之禮伏請准元和元年十月二十三日勅外命婦有邑號者每年元日冬至立夏立秋立冬赴皇太后宮門進名奉叅如遇泥

雨即傳制曰可九月辛酉立冬外命婦詣興慶宮進名
候皇太后起居十一月丁未日南至羣臣及命婦赴興
慶宮進名奉賀皇太后

長慶元年四月甲午以張弘靖入幽州時幽州劉總納

土詔以弘靖代之帝御紫宸殿受朝

時綏定兩河克平
交趾北虜納徵西

戎請盟京師及四方頻遇豐年天下暫獲晏如也時議
者皆以河朔負固不來庭久矣至是不勞師而幽土底
定庶幾小康而識者以為止戈偃武皆資治理雖君有
仁聖之姿而股肱未稱政令之出中外不行既未有以
厭於人心則成功不可以偶
致稽諸倚伏深懼其兆亂焉十一月丁酉以討鎮州勅

權停今年冬至朝賀

二年正月癸巳朔以幽鎮阻兵不受朝賀

時幽州朱克融囚張弘靖

鎮州王庭湊殺田弘正

宰臣率百官泊内外命婦候皇太后起居

於興慶宮八月詔曰夏秋之間嘗多水潦如緣暮夜暴雨道路不通車馬宜便放其日朝叅委御史臺勾當仍每日奏如雨不至甚即不在此例十一月戊午日南至宰臣與百官泊内外命婦候皇太后起居於興慶宮

冊府元龜卷一百七

欽定四庫全書

冊府元龜卷一百八

宋 王欽若等撰

帝王部

朝會第二

唐敬宗以長慶四年正月即位二月辛巳縗服受羣臣
謁見於紫宸門外之西廊丁亥詔宜令三月三日御丹
鳳樓仍令所司准式辛丑御紫宸殿羣臣初展入閣之
儀五月詔停諸親王端午叅賀十月癸巳禮儀使奏來

月二十三日冬至准故事山陵未祔廟並不合行慶賀之儀其朝賀皇太后請停又十二月乙未勅來年正月一日朝賀宜權停

寶歷二年正月己巳朔御含元殿受朝賀

文宗太和元年十一月甲申日南至宰臣率百官泊外命婦詣興慶宮及光順門行朝賀之禮

其年不朝會准詣興慶宮光順

門史闕文下同此

是月中外進獻賀冬如常歲

二年正月戊午朔權停朝賀文武百寮及命婦並赴興

慶宮及光順門起居太皇太后義安皇太后十一月己丑日南至宰臣及百寮詣興慶宮光順門進名起居三年五月乙酉以滄州李同捷平百寮稱賀于宣政殿十一月辛巳冬至朝賀與郊祀並停

四年正月丙子朔權停朝賀之禮中書門下及文武百寮赴興慶宮及光順門奉賀太皇太后皇太后如常儀五年正月庚子朔以陰雨連旬罷元會之禮十一月壬辰勅陰雪未晴其明年正月一日朝賀宜權停

六年正月乙未朔以前詔廢元會

七年正月乙丑朔御含元殿受朝賀禮畢百寮赴興慶宮賀太皇太后義安太后光順門賀皇太后比年以大雪未行元會之儀至是文武大備中外慶悅十一月癸丑朔乙卯日南至宰臣文武百寮及命婦赴興慶宮賀太皇太后義安太后迴赴光順門賀皇太后

八年正月癸丑百寮延英進名起居又詣光順門賀皇太后興慶宮賀太皇太后義安太后十一月庚申日南

至宰臣率百寮等奉賀如常儀

九年正月丁未朔權停朝賀之禮宰臣率百寮詣興慶宮賀太皇太后義安太后光順門賀皇太后

開成元年正月己酉詔以入閣日次對官班退立於東階松樹下須宰臣奏事畢齊至香案前各言本司事左右起居又待次日對官奏事畢方出

二年正月乙丑朔權停朝賀之禮宰臣率百寮赴興慶宮賀太皇太后義安太后復列班於光順門賀皇太后

十一月丙子日南至百寮及命婦並赴南內起居太皇太后義安太后迴赴光順門起居皇太后

三年正月庚申朔權停朝賀之禮宰臣及文武百寮於南內進名奉賀太皇太后義安太后迴於光順門進名賀皇太后如常儀

懿宗咸通七年正月戊寅朔以太皇太后喪罷元會十年正月乙未朔以徐泗用兵罷元會

昭宗天復二年十一月詔曰漢宣帝中興五日一聽朝

歷代通規永為常式近則不循往儀因此別為制度既
奸邪之得計致臨視之失常須守舊規以循國制宜每
月只計一五九日開延英計九度其入閣日仍於延英
一度內指揮如或有大段公事中書門下具膀子奏請
開延英不係數日事十二月勅宮嬪女職本備內任近
年以來稍失儀制宮人出內宣命案御叅隨視朝乃失
舊規須為永制今後每遇延英坐朝日只令小黃門祇
候引從宮人不得擅出內門庶循典儀免致紛雜

三年五月中書門下文武百寮舊制每月一度入閣于
貞觀殿朝叅勅曰貞觀大殿朝廷正衙遇正至之辰受
羣臣朝賀俾循規制須有指揮其入閣自今後宜令宰
臣文武百寮于崇勲殿候對十一月文武兩班官貢每
遇一五九朝日元帥朱全忠請排廊食詔曰百寮入朝
兩廊賜食遷都之後所司闕供元帥梁王欲整大綱復
行故事罔思勞費悉自再圖是使端簡在庭咸思感悅
我冠就列益任優隆備覩寵規彌增欽歎宜賜詔獎飭

仍付所司

哀帝天祐二年四月勅自今年五月一日後常朝出入取東上閣門或遇奉慰即開西上閣門永為定制

後唐莊宗同光元年十一月丁未日長至帝不受朝賀

百官詣東上閣門拜表稱慶

議者以為長至元會歲中之大朝斯為盛禮著於令

式是日合陳樂懸排細仗一人當陽昭國容也兵興以來而斯禮或闕帝初一函夏不復唐典無故輟禮議者

惜十二月中書門下奏每日常朝百官皆拜獨兩省官

不拜准本朝故事朝退於廊下賜食謂之廊食百寮遂

有謝食拜唯兩省官本省有厨不赴廊飡故不拜伏自
僖宗幸蜀迴以多事之後遂廢廊飡百官拜儀至今未
改將五十載禮恐難停唯兩省官獨尚不拜豈可終日
趨朝曾不一拜獨於班例有所異同若言官是近臣於
禮尤宜肅敬起今後逐日常朝宣不坐除職事官押班
不拜外其兩省官與東西兩班並齊拜從之

二年正月庚子朔帝袞冕御明堂殿受朝賀太常樂左
右金吾仗六軍諸衛如常儀是月庚申四方館奏常朝

諸職負多有叅雜今後除隨駕將校外方進奉專使文武兩班三品以上官可於內殿對見其餘並詣正衙以申常禮從之七月戊戌朔帝御文明殿視朝八月癸巳宣旨放三日朝叅以霖雨甚故也十一月乙未朔帝御文明殿視朝

三年正月甲午朔帝御文明殿受朝賀如常儀是月庚子車駕幸鄴都庚戌車駕至鄴都帝自千秋亭乘輦備法駕晡晚歸宮辛亥帝御武德殿受朝賀以百官扈從

之勞放十九日至二十日朝叅三月癸巳朔車駕在鄴

帝御武德殿視朝

是月車駕還維都

六月壬戌朔帝御文明殿

視朝癸酉勅泥塗稍甚放文武常叅三日丁亥以霖雨

放朝七月乙未勅霖雨未止泥塗頗甚宜放五日六日

朝叅戊戌勅泥塗頗甚放八日九日朝叅丁亥以霖雨

放朝八月己丑勅比聞天津橋未通往來百官以舟舩

濟渡因茲傾覆兼踏泥途自今文武百官三日一趨朝

宰臣即每日中書視事閏十二月己丑朔帝御文明殿

視朝

四年正月乙亥勅風雪稍甚宜放三日朝叅

明宗天成元年四月入雒陽甲申始御文明殿改元肆
赦五月丁巳內出御劄一封賜宰臣曉示文武百寮每
日正衙常朝外五日一度赴內殿起居宰臣百官班於
文明殿庭謝其中書非時有急切公事請開延英不在
此限乙酉勅每月十五日賜廊下食本朝承平時常叅
官每日朝退賜食廊下謂之廊食自乾符亂離以後庶

事草創百司經費不足無每日之賜但遇月旦入閣日賜食帝初即位始因諫官疏奏請文武百寮五日一起居見帝於便殿李琪以為非故事以五日為繁請每月朔望日皆入閣賜廊下食罷五日起居之儀至是宣每月朔望皆入閣依奏五日一度起居不得停廢遂以為常七月乙卯朔帝御文明殿視朝八月壬辰以積雨泥甚放百寮朝參己亥帝御文明殿百官入閣如月朔之儀從新例也九月丙辰帝御文明殿入閣新制次日例

也十月甲申朔帝御文明殿視朝己亥帝御文明殿對

南詔蠻兩林鬼主等百寮稱賀

是月右拾遺曹珍上疏內一件百寮朔望入閣

及五日一度內殿起居請許三署寺監官輪次轉對奏事從之

十一月甲寅朔帝御文

明殿癸亥日南至帝御文明殿百寮稱賀十二月甲申

朔帝御文明殿見百寮

二年正月癸丑朔帝被袞冕法服御明堂殿百寮稱賀

文物仗衛禮樂如常儀丙申詔曰君使臣以禮臣事君以忠禮不可一日不修忠不可一夕不念二者全則上

下順一途廢則出入差須振綱維以嚴規矩凡在策名之列皆知辨色之朝儻不夙興是虧匪懈君上思政猶自求衣未明為下服勤固合假寐待旦宜令御史臺徧示文武兩班自此每日早赴朝叅職司既得整齊公事的無壅滯如或尚茲懈怠具錄奏聞三月壬子朔帝御文明殿視朝四月乙未帝御文明殿視朝五月辛亥朔帝御文明殿視朝戊辰帝御文明殿視朝六月庚辰朔帝御文明殿視朝甲午帝御文明殿受朝七月庚戌朔

帝御文明殿視朝戊辰帝御文明殿受朝甲戌百官朝
於中興殿八月庚辰百官朝於中興殿癸巳帝御文明
殿視朝九月庚戌帝御文明殿視朝庚申百官朝於中
興殿癸亥帝御文明殿視朝丙子百官朝於中興殿十
月己卯朔帝御文明殿視朝乙酉帝幸汴州甲午車駕在汴御
崇元殿視朝十一月戊申朔帝御崇元殿視朝壬戌帝
御崇元殿視朝戊辰日南至百官詣閣門拜表稱賀十
二月戊寅朔帝御崇元殿視朝戊子百官朝於玄德殿

壬辰帝御崇元殿視朝

三年春正月戊申朔帝御崇元殿受朝賀禮樂仗衛如
常儀甲子帝御崇元殿視朝二月戊寅帝御崇元殿視
朝丁酉百官朝於玄德殿三月丁未朔帝御崇元殿視
朝四月丁丑帝御崇元殿視朝五月乙巳朔帝御崇元
殿視朝己未帝御崇元殿視朝六月甲戌朔帝御崇元
殿視朝戊子帝御崇元殿視朝七月甲辰帝御崇元殿
視朝八月癸酉帝御崇元殿視朝閏八月癸卯朔帝御

崇元殿視朝九月甲戌帝御崇元殿受朝十月壬寅朔

帝御崇元殿視朝丁未帝御崇元殿視朝壬戌中書奏

按貞元四年中書侍郎李泌奏冬至日受朝賀請准元

日從之十一月癸酉冬至帝御崇元殿受朝賀仗衛如

式

是月中書舍人劉贊奏往例應諸道節度使及兩班大寮凡對朝廷例合通喚近日全廢此儀伏乞特詔

所司重定向來格品若合通喚准日施行尋准四方館狀稱舊例節度使新除中謝及罷任赴闕朝見合得通

喚文班三品以上武官二品以上官新除中謝及使回朝見亦合得通喚從之丙戌帝御崇元

殿視朝十二月丙午帝御崇元殿視朝癸丑中書以常

朝宣奉勅不坐兩省官與東西班並拜宰臣不拜或聞班行所論承前日有廊食百官謝食兩省即各有常厨從來不拜或曰以侍臣不拜檢尋故實不見明規百官拜為廊食即承旨合宣有勅賜食供奉官不拜亦恐非儀且左右前後之臣日面天顏豈可不拜况庶官見宰臣隔宿並拜實以赴朝不拜非禮也聞勅不拜亦非禮也所宜盡敬以奉君親臣等商量今後常朝宰臣亦拜通事舍人亦拜閣外放仗亦拜從之壬戌帝御崇元殿

視朝

四年正月壬申朔帝御崇元殿受朝賀仗衛如常儀二

月壬寅帝御崇元殿視朝

是月庚午車駕還維

三月己酉帝御文

明殿視朝四月中書門下奏五月一日入閣起居准貞

元七年四月二十八日勅昔者聖賢觀象因天地交會

之次為父子相見之儀沿習成風古今不易王者制事

在於因人酌其情而使中順其俗以為禮咸覲之義既

行父子之間資事之情豈隔君臣之際自今後每年五

月一日御宣政殿與文武百寮相見京官九品以上外
官因朝奏在京者並聽就列宜令所司量定儀注頒示
天下仍編禮式永著常規者伏以本朝舊制近代不行
方當開泰之期難曠會同之禮宜興墜典以耀明庭五
月一日應在京九品以上官及諸進奉使並准貞元七
年勅就位起居自此每年永為常式者奉勅宜依五月
己卯朔帝御文明殿視朝癸未帝御文明殿視朝六月
戊戌朔帝御文明殿視朝壬子帝御文明殿視朝七月

戊辰朔帝御文明殿視朝八月丁酉朔帝御文明殿視朝辛亥以霖雨甚宣旨放入閣九月戊辰帝御文明殿視朝辛巳帝御文明殿見百寮十月丙申朔帝御文明殿視朝十一月丙寅朔帝御文明殿視朝己卯日長至帝御文明殿受朝賀樂懸仗衛如常儀十二月丙申朔帝御文明殿視朝

長興元年正月丙寅朔帝御明堂殿受朝賀樂懸仗衛如常儀二月乙未朔帝御文明殿視朝是月郊祀畢丙

辰勅宜放兩日朝參以百官行事之勞故也四月丙午朔帝御文明殿視朝五月甲子朔帝御文明殿視朝七月壬戌朔帝御文明殿視朝庚寅詔諸州得替防禦團練使刺史並宜於班行比擬如未有負闕可隨常叅官逐日立班新例也八月壬辰朔帝御文明殿視朝十月辛卯帝御文明殿視朝十一月庚申日長至帝御文明殿受朝賀樂懸仗衛如常儀

二年正月庚寅朔帝御文明殿受朝賀如常儀四月庚

寅帝御文明殿視朝癸卯帝御文明殿視朝五月戊午
朔帝御文明殿視朝閏五月戊子朔帝御文明殿視朝
壬寅帝御文明殿視朝六月丁巳朔帝御文明殿視朝
七月丙戌朔帝御文明殿視朝八月丙辰朔帝御文明
殿視朝庚午帝御文明殿視朝癸酉詔文武百官五日
內殿起居仍舊其輪次對宜停若有封事許非時上表
朔望入閣待制候對一依舊制九月己亥帝御文明殿
視朝十月乙卯朔帝御文明殿視朝十一月甲申朔帝

不視朝先是司天奏朔日合日蝕二分伏緣所蝕之分數微少太陽光影相爍不辨虧缺伏請十一月一日不入閣百官不守司故不視朝己丑日長至帝御文明殿百寮稱賀十二月庚申左諫議大夫盧損上言前任節度刺史防禦等使請五日隨例起居並從之

三年正月癸未朔帝御明堂殿朝賀禮樂仗衛如式庚子帝御文明殿視朝二月甲寅帝御文明殿視朝戊申帝御文明殿視朝三月癸未朔帝御文明殿視朝羣臣

入門遇雨而罷乙酉勅文武兩班每遇入閣從官並賜
酒食從前臺官及諸朝官皆在敷政門外兩廊下就食
唯北省官於敷政門內既為隔門各不相見致行坐不
齊難於整肅起今後每遇入閣賜食北省官亦宜令於
敷政門外東廊下設席以北為首待班齊一時就坐四
月甲寅朔帝御文明殿視朝五月壬午朔帝御文明殿
視朝六月己未勅以霖雨經旬街衢泥濘文武兩班宜
放今月八日朝叅甲子朔勅放三日朝叅大雨故也八

月庚戌帝御文明殿視朝九月己丑帝見羣臣於端明殿十一月己卯朔帝御文明殿視朝甲子日長至帝御文明殿百寮稱賀十二月戊申朔帝御文明殿視朝

四年正月戊寅朔帝御文明殿百寮稱賀乙未帝見百寮於中興殿五月丙子朔帝法服御文明殿百寮具朝服稱賀庚寅帝見百寮於文明殿六月丙申朔帝御文明殿視朝丙寅帝見百寮於廣壽殿時帝不豫旬日至是稱平帝勤於聽政接臣下無倦九月甲戌朔帝御文

明殿視朝十月甲辰朔雨不視朝十一月癸酉帝御文明殿視朝

閔帝長興四年十二月癸丑朔即位其月辛未御中興

殿羣臣列位

時馮道升階進酒帝曰比於此物無愛除賓友之會不近樽竿况在沉痛之中安事

飲啜命撤之

應順元年春正月壬申帝御廣壽殿視朝其月戊寅帝御明堂殿仗衛如常儀宮懸樂作羣臣朝服就坐宣制大赦改元閏正月癸卯朔帝御文明殿入閣

末帝清泰元年四月乙酉帝服袞冕御明堂殿文武百官朝服就列改應順為清泰是月庚寅中書門下上言太常以五月朔御明堂受朝三日夏至祀皇地祇前二日奏告獻祖室不坐比正旦冬至是日有祀事則次日受朝今祀在五鼓前質明行禮畢御殿在始旦後請比例行之詔曰日出御殿與祀事無妨宜依常年例五月庚子朔帝御文明殿視朝六月辛卯御史中丞張鵬奏文武常叅官入閣日廊下設食每宣放仗拜後就食相

承以為謝食拜臣以每日常朝宣不坐後拜退豈謝食之謂乎如臣所見自今宣放仗拜後且就次候將設食別降使於敷政門外宣賜酒食羣臣謝恩後食從之十月庚子太常言冬至不視朝百寮表賀是日太府設表案席褥禮部進表至閣門班首一員跪表受閣門使羣臣俱拜舞蹈訖表入久之閣門使出宣曰履長之慶與卿等同之羣臣復拜舞訖而退十一月己巳御史臺奏前任節度防禦團練使等刺史行軍副使近儀五日一

度內殿起居皆綴班叙立元係班簿雖曰便殿起居其遇全班起居時亦合綴班從之

二年三月庚戌御文明殿羣臣入閣刑法官劇可久待制官李慎儀次對十二月戊寅太常言來年正月元日合御明堂受朝賀其日上辛祀昊天上帝于南郊以禮大祀不坐詔曰其祀事在質明前儀仗在日出後事不相妨宜依常年受朝

三年春正月辛卯始御文明殿陳樂懸仗衛受朝賀班

退進名賀皇太后三月庚子詔閣門陳內外官吏對見
例應諸州差判官軍將貢奉到闕無例朝見以名御奏
放門見賜酒食得回詔進膀子放門辭臣今後欲只令
朝見餘依舊規應除諸道兩使判官推巡無例中謝奏
過放謝放辭如得替歸京無例見臣欲今後除兩使判
官許中謝門辭其書記以下除替請依舊規應文武朝
官除受文五品武四品以上并中謝以下無例對謝以
天成四年正月勅凡昇朝官新授並中謝欲以此例諸

道節度使差判官軍將進奉到闕朝見候得回話下牒
子奏過令門辭應諸道都押牙馬步都虞候鎮將替到
京無例見或在京受任無例中謝進牒子放謝放辭應
諸道商稅鹽麴諸色務官或在京差補亦放謝放辭得
替歸京亦無見例在京商稅鹽麴兩軍巡即許中謝應
新除令錄並中謝次日放門辭兼有口宣誠勵應文武
兩班差弔祭使及告廟祠祭只於正衙辭見不赴內殿
諸道差進奏官到闕得見以後請假得替進牒子放門

辭已前六件望依舊例行從之

晉高祖天福元年十一月御北京崇元殿改元

二年正月甲寅朔帝御文明殿受文武百寮朝賀三月
己未御史臺奏唐朝定令式南衙常叅文武百寮每日
朝退於廊下賜食謂之堂食自唐末亂離堂食漸廢仍
於入閣起居日賜食每入閣禮畢閣門宣放仗羣官俱
拜謂之謝食至偽主清泰元年中入閣禮畢更差中使
至正衙門口宣賜食百寮立班重謝此則交失有唐堂

食之意於禮實為太煩臣恐因循漸失根本起今後入閣賜食望不差中使口宣請准唐明宗朝事例處分從之四月丙午御史臺奏文武百寮每五日一度內殿起居在京城時百官於朝堂幕次自文明殿門入穿文明殿庭入東上閣門至天福殿序班令隨駕百官自到行朝每遇起居日於幕次東出升龍門與諸色人排肩雜進自外繚繞方入內門臣竊見昇龍門外庭宇不寬人徒大集或是諸司掌事或是諸道使臣方集貢輸不可

止約若令與衣冠雜進朝士並趨則恐有壞天官見輕
朝序權時之義事理難安起今後每遇百官赴內殿起
居日請依在京事體百官於幕次自正衙門入東出橫
門既協京國常儀兼在行朝便穩從之庚戌御史臺奏
文武百寮每月朔望入閣禮畢賜廊下食在京時祇於
朝堂幕次兩廊下今在行朝於正衙門外權為幕次房
廊湫隘間架絕少伏恐五月一日朝會禮畢准例賜食
即與幕次難為排比伏見唐明宗時兩省官於文明殿

前廊下賜食今未審每遇入閣日權與正衙門內兩廊下排比賜食為復別有處分者勅旨宜依明宗時舊規五月壬子朔帝御崇元殿備太常樂受文武百官朝賀六月甲午太妃將至行闕放文武朝一日十一月中書奏准唐貞元二年九月五日勅文官充翰林學士及皇太子諸王侍讀武官充禁軍職事並不常朝叅其在三館等諸職事者並朝叅訖各歸所務者自累朝以來文武在內廷充職兼判三司或帶職額及六軍判官等例

不赴常朝元無正勅准近勅文武職事官未昇朝者按舊制並赴朔望朝叅其翰林學士侍讀三館諸執事望准元勅處分其在內廷諸司使等每受正官之時來赴正衙謝後不赴常朝大會不離禁廷位次三次職官免常朝唯赴大朝會其京司未昇朝官負抵赴朔望朝叅帶諸司職掌者不在此例文官除端明殿翰林學士樞密院學士中書省知制誥外有兼官兼職者仍各發遣本司供事可之

三年正月戊申朔帝御崇元殿受朝仗衛如式五月丁未朔帝御崇元殿奏太常樂受文武百官二王後三恪皇親蕃客等朝賀十一月丙寅冬至帝御崇元殿受朝賀

四年正月癸卯朔帝御崇元殿受朝賀仗衛如式五月壬寅朔帝受朝于崇元殿七月壬寅朔帝御崇元殿百官入閣如常禮朔不入閣日蝕故也閏七月庚子朔百官不入閣雨霑服也十二月丁酉朔百官不入閣大雪

故也

五年正月丁卯朔帝御崇元殿朝賀仗衛如式壬辰馮
道奏曰宰臣朝見辭謝在朝堂橫街之南逮至餘官則
悉於崇元門內夫表著之列豈可踰之故古先明王必
正其位服此實事因偶爾習以為常又入閣禮畢之時
羣官退於門外定班如初俟宣放仗唯翰林學士前任
郡守等不隨百辟即時直出二者禮僭序失其使正之
帝深然其言于是下詔曰官爵之班即分高下見謝之

位豈有異同宜格通規以為定制今後宰臣使相朝見
辭謝並於崇元門內與諸官重行異位一時列拜假開
橫行即從舊例又入閣之儀序班為重宣喚則齊趨正
殿放仗則各出朝門何起居之禮即同而進退之規有
異其翰林學士及前任郡守等今後入閣退朝宜依百
官班制十一月冬至帝受朝於崇元殿王公上壽

六年春正月辛酉朔帝受朝於崇元殿七月己未朔帝
御崇元殿視朝

七年春正月丙辰朔帝不受朝賀用兵故也五月己亥
中書門下奏時屬炎蒸事宜簡省應五日百官起居即
令押班宰臣一員押百官班其轉對官兩員封事付閣
門使引進本官起居後隨百寮退不用別出謝恩其文
武内外官寮乞假寧親搬家及婚葬病損並門見辭諸
道進奉物等不用殿前排列引進使引至殿前奏云某
等進奉奏訖其進奉物便出其進奉專使朝見日班首
一人致詞都附起居州刺史并行軍副使諸道馬步軍

都指揮使以下差人到闕並門見門辭州縣官謝恩日
甲頭一人致詞不用逐人告官其供奉官殿直等如
是當直及於合殿前排立者即入起居如不當直排立
者不用每日起居委宣徽院專切點檢常須整齊從之
少帝開運元年七月辛未朔帝御崇元殿八月癸卯倉
部郎中知制誥陶穀奏內外臣寮正衙辭謝內則諸司
小吏與宰相差肩外則屬郡末寮共元戎接武欲望宰
臣使相依舊押班其郡牧藩侯臺省少監長吏等不得

令部內本司卑冗官員同班辭謝勅從其奏十一月乙亥吏部侍郎張昭遠奏文武常叅官每日於正衙立班閣門使宣不坐後百寮俱拜舊制唯押班宰相押樓御史通事舍人各緣提舉贊揚所以不隨庶官俱拜自唐天成末議者不悉朝儀遽違舊典遂令押班之職一例折腰此則深忽禮文殊乖故實且宰相居庶寮之首御史持百職之綱嚴肅禁庭糾繩班列慮於拜揖之際或爽進退之宜於是凝立靜觀檢其去就若令旅拜旅揖

實恐非宜况事要酌中恭須近禮人臣愛主不在於斯其通事舍人職司贊導比者兩班進退皆相其儀今則在文班武班之前居一品二品之上端笏齊拜禮實未聞其押班宰相押樓御史通事舍人並請依天成三年以前禮例施行無至差忒殿中侍御史賈玄珪奏是非既異沿革不同舉之則雖有舊規考之則全無故實且夫酌人心而致禮依神道而設教此乃經國之大端也况通事舍人居贊導之職押樓御史當糾察之司一則

示於紀綱一則防於謬悞所以靜觀進退詳視等威實
非抗禮于庭所謂各司其局俾令不拜雅合其宜伏以
宰相押班率千官而設拜起居內殿統百辟以致詞儀
刑文武之班表式鵷鸞之列不得比贊導之職詎可同
糾察之司統冠羣寮所宜列拜臣位居憲府迹廁同班
言或庶其得中罪難逃於多上帝從之

二年春正月戊戌朔帝不受朝賀不豫故也六月乙丑
朔帝御崇元殿百官入閣

漢高祖乾祐元年正月辛亥朔帝不受朝賀

二年五月中書舍人艾穎上言近制一月兩度入閣五日一度起居近年以來入閣多廢每遇朔望不面天顏

臣請今後朔望入閣即從常禮如不入閣即請朔望日

起居冀面聖顏以伸誠敬

史臣曰天子居丹雘服內雖終一月之制而獨宴不舉樂

朔不視朝近古禮也艾穎請朔望相見于禮非宜

周太祖廣順元年四月壬辰朔帝御廣政殿羣臣起居

十月壬寅雪尺餘放朝

二年五月丙辰朔帝御崇元殿受朝仗衛如儀十一月
癸丑朔入閣己卯日南至帝御崇元殿羣臣服朝服稱
賀退班于永福殿庭上壽賜羣臣酒三爵而罷

三年正月壬子朔帝御崇元殿羣臣朝賀樂懸仗衛如
常儀班退太祖御永福殿羣臣百寮稱觴獻壽舉教坊
樂旋幸太平宮起居漢太后五月己卯朔帝服袞冕御
崇元殿受羣臣朝服班于位陪位官樂懸仗衛如常儀
十一月乙酉日南至帝不受朝賀羣臣閣門拜表班退

賜茶酒

世宗顯德元年八月壬寅朔帝御崇元殿文武百寮入閣仗衛如儀十一月辛未朔帝御崇元殿文武百官入閣仗衛如儀庚寅日南至帝不御殿文武百寮詣閣拜表稱賀

二年春正月辛未朔帝不御殿宰臣率百官拜表稱賀四月己亥帝御崇元殿文武百官入閣仗衛如儀八月丁酉朔帝御崇元殿百官入閣如儀

三年春正月乙未朔帝不御殿文武百官詣閣進名稱賀六月壬戌朔帝御崇元殿文武百官入閣仗衛如儀十一月庚子日南至帝不御殿以宣懿皇后之喪在近故也宰臣率百官詣閣門拜表稱賀

四年正月己丑朔帝御崇元殿受朝賀禮畢御廣政殿羣官上壽並如常儀二月辛酉詔曰文武百寮起今後每遇入閣日宜賜廊食此有唐之舊制也自晉氏多故寢而不行上以寵待廷臣故復有是命五月丁亥朔帝

御崇元殿視朝太常樂懸金吾仗衛如儀八月乙卯朔
帝御崇元殿文武百官入閣如儀既罷賜百官廊食時
帝御廣德殿西樓以觀焉命中黃門閱視酒饌無不腆
五年春正月癸未朔帝在楚州西北衣戎服御帳殿受
宰臣以下稱賀五月辛巳朔帝御崇元殿金吾仗衛太
常樂如儀十一月辛亥日南至帝御崇元殿受朝賀金
吾仗衛太常樂懸如儀禮畢宰臣率百寮常服詣永德
殿上壽而退

六年春正月丁未朔帝御崇元殿受朝賀金吾仗衛太
常樂懸如儀

冊府元龜卷一百八